

# *NAKO EA KŌPANO LE PONTŠO*

 Malume mantsiboea ana. Ke monyetla ho fihla mona bosius bona, le ho ema tulong ena.

<sup>2</sup> 'Na, hoseng hona, ha ke theoha ka tsela... E sa le ke tsoile ho ea rapela, ho emela Morena. 'Me ha ke theoha ka tsela, ke ile ka bulela e—e moreri oa radio, Moena Smith, moena oa bammala (na bohole le mo utloile hoseng hona? Mang feela oa lōna?) holimō koana, kea kholoa ke Ohio. Motho o na nts'a mpolella ka therò ea hae, le ho re, "U tlameha ho mo bulela," ka mokhoa oo.

<sup>3</sup> Ke tsoatsoile ke mo fumane, hoseng hona. 'Me a hlile a bua kamoo sebe se atileng lefatšeng kajeno, 'me o ne a... Eaba ke bulela pejana, seteishene ho tloha moo, ka theoha ka utloa e mong. Nakong ha ke theohela mono, ke batla ke itokisitse, ho bona haeba nako eso tlole ho tla kerekeng, hoseng hona ha ke kena. Ka hona, ruri re fuoe monyetla o moholo ho fihla koano bosiu bona, ho sebetsa tšebeletsong ea Morena.

<sup>4</sup> Le ho bua ka Moena Neville, le ka molaetsa oa letsatsi le leng, ho leleitinyana lena, khaitseli ea rōna e sa tsoa tloha ho rōna. E ne e le eēna, bohole rea tseba hore e ne e le mang, ke Khaitseli Weaver. Le ho nahana ka monna mona, ea kolobetsoang bosius bona; eēna... ke mo kolobelitse letšeng lena mohla ke... ba ne ba tlamehe ho mo tlisa koano ka setulo sa bakuli. O ne a bolaoa, ke mofetše, 'me a saletsoe ke bosiu boo feela ho phela; lingaka li se li mo tetse, a tla shoa hoseng ho hlahlamang. 'Me ka kena lapeng la hae ka leka ho qoqa le eēna ka pholiso ea Khalalelo, 'me a sa khaotse ho re, "Ha kea tšoanela hore u ka kena tlas'a marulelo a ka." A re, "Ha ke—ke na tokelo ea ho re moreri a ka kena tlung ea ka." A re, "Ke moetsalibe." Empa a re, "Monghali, ha ke batle ho shoa ka tsela ena." 'Me ka baka leo Grace Weber, holimō mona, a nkisa tlase mono. Ke sa tsoa kena, ke khathalitsoe ke likōpano; 'me teng ea re ke sa mo rapella, le ho 'mallia Lengolo, eaba o a pholosoa. Eaba, a batla a sa khone ho phahamisa letsoho la hae, empa a batla ho tsukutla mang le mang ka matsoho. A mpa feela... ntho e ne e etsahetse ho eēna.

<sup>5</sup> 'Me ha ba ntse ba tsukutlana ka matsoho, ka bona pono ea hae a tobile serobeng sa likhoho, a khutla. Ka re, "Ho lokile, ho tla itokela joale"; 'me mono ke lilemo tse leshome le metso e robeli tse fetileng. 'Me esale a etile mofetše oo pele, ka linako tsohle. Haeba a shoele... Ha a bolaoa ke mofetše, o futuhetsoe ke lefu la pelō. Ba ne ba mo suntse tlasa oksejene; o bolaue ke lefu la pelō.

<sup>6</sup> Eaba ke ntse ke nahana, hantle feela qetellong ha batho ba tsoa, ba bina, *Eaba Jesu O A Fihla*. Ke sona hantle se hlahleng, O ttile a baballa bophelo ba hae lilemo tse leshome le metso e robeli

tseo. 'Me ka nahana, "E tšoaneleha hakakang." Mohlomong mosali eo ha a tseba a ne a e sebetsa joalo. Ka hona, hape, mohlomong o entse joalo. Empa feela ea hla ea tšoanelia ho kenya karolo eo mono, *Eaba Jesu O A Fihla*.

<sup>7</sup> Joale ke pejana, feela—kea tšepa, kenela likōpano tse khōlō. Ke hlile kea ferekana. Hoseng hona, keha ke hlile ke tšophahane, ka nyoloha ho—ho ea rapela. 'Me ke—ke fihlile hae, ho khutlela mona. Lelapa, ke sa tsoa ba isa Arizona, 'me ke... hore bana ba kene sekolong. 'Me ke khutletse mona feela ho—ho phomola, ho ea tsoma le Moena Wood le sehlopha baena mona; ho ea tsoma, veke ena e tlang. Re theohela Kentucky. 'Me ke ne... ke bile... Ke tsoatsoile ka fihla ka letsatsi leo—leo Mof. Weaver a hlokahetseng ka lona, 'me ke bottle feela ha ke le koano le ho thusa Moena Neville ka lepato leo.

<sup>8</sup> 'Me ha ke leke ho... Ha ke leke ho—ho bua haholo ka eona, ua tseba, har'a batho ho ttleleba. Hobane, kea kholoa, e 'ngoe ea lintho tse nyarossang ka ho fetisa ke ho bona e—e monna kapa mosali ea ttlelebang ka mehla. Esale ke nahanne, "Molimo, ak'o mpaballe ho eona." Ua bona, hoo—hoo ho fokolisa tumelo ka mehla, ua tseba. U mpa feela—u mpa feela... haeba u—haeba u... Kea tseba ha ba tsofala, mang le mang oa rōna, re hlaheloa ke ho hong 'me ntho e etsahale. 'Me ke tseba lintho tseo li tla lula li phaellana, ha u tsofala, li tlamehile feela. Empa ke hopola e 'ngoe ea lintho tse nyarossang ho fetisa, ke ha Satane a roesa bophelo ba motho ea itseng moqhaka: leqheku le mabifi la monna kapa la mosali, ua bona. Kea—kea tšepa nke ke ka fihla tulong eo. Kea tšepa nka e jara, meroalo ea ka, le—le ho fihla moo... Ke batla bophelo ba ka bo roesitsoe moqhaka oa Khanya ea Molimo: mamello ea Hae, mosa, khotso, bonolo, le ho tlatsoa ka Moea o Halalelang.

<sup>9</sup> 'Me ke... e 'ngoe ea lintho tse ntetekileng bophelo ba ka bohole, ebile maemo a linerefe. Ke mohla ke katilehang hakana, ke hlile kea tepella. Ke tleloa... e ka re ha ho motho ea u tsotellang, ua tseba, 'me—'me ka hlohle u... E a le fihlela, le lōna. 'Me ke hlile ke noa nkho ea eona e phophomang, ua tseba, 'me ka linako tse ling ehlile e a khohlalala, 'me ke batla ke sa khone le ho... Ke khatello, ke sona se e bakang. 'Me ke fihla moo hangata, haholo ka baka la lipono tse ngata tseo, ua bona, ehlile e a ntšoara. Ke shebe motho, kea nahana, "Ena ke pono. Che, che, che, ha se eona. E! Na ha se eona?" Ua bona? 'Me ha le lemohe moputso o khemang le taba eo. Ka hona—ka hona u—u a ipotsa. Hape u a nahana, "Be, u a..." U ikhulela kathoko 'me u re, "Be, joale, ebe—ebe ke entse eng? Ke 'na enoa, ke—ke lilemo tse mashome a mahlano 'me ha ke eso etsetse Morena letho; 'me ke—kea tsofala. 'Me ke eng...? Oh, banna." Ebe u tšoaroa feela ke... seo re neng re se bitsa "ho jeoa ke bolulu." Lōna baena thaka tsa ka le sa hopola seo ba neng ba se bitsa "ho tšoaroa ke bolulu." Pop o n'a tloaetse ho bua ka eona 'me ke ipotse seo a neng a se bolela, 'me

joale ke hlile ke tseba seo a neng a se lekanya. 'Me ka hona, u ikutloa joalo, ka tšoanelo ha se 'nete; e mpa e le uena feela, u a e tseba. Ua bona, ua e tseba, e mpa e le uena ea etsang joalo.

<sup>10</sup> Ka hona ke ne ke leka ho ikokobetsa nakoana joale, le ho itokisetsa e—e pitlahano eo ke tsepang e tla kapele. Le ho feta har'a... Ke lokela ho ea New York hang, 'me ke... kōpanong holimō mono, ke letšolo. Le ho theohela Shreveport, le ho khutlela hape Phoenix. Le ho khutla ka la bophirima... moeli o ka boroa oa Linaha tse Kopaneng. 'Me joale ba rala litlhophiso tsa mose ho maoatle, ho qala ka potlako eo re e khonang ka morao ho la pele la selemo, nka re Hlakubele, 'Mesa, ntho e kang eo; moo u qalang Stockholm kapa Oslo, le ho pota lefatše, haeba re ka khona leetong lena le tlang.

<sup>11</sup> 'Me joale ke khutletse hae, ntho e kang phomolo ea nakoana, ho iphumana le ho itlhasimolla. 'Me ha Morena a ratile, ke tla khutla Sontaha se tlang, ho tsoa tlase Kentucky. 'Me—'me haeba ho itoketse, ho khahlile Morena, 'me Moena Neville a sa tsotelle; be, ke tla leka feela ho tšoara tšebeletso Sontaha se tlang, haeba—haeba Morena a ratile. 'Me haeba A ratile joaloka Moena Neville, ke—ke tla ba mona. E monghali, O mpa feela a... haeba A e ratile hakaalo ka Moena Neville. 'Me ke tšepa A le joalo. Joale, ua bona, ka hona ke tseba kapele, ha Morena a ratile, hore ke tla le siea nakoana.

<sup>12</sup> 'Me ke... melaetsanyana feela, ha ke thonaka nthoana pelōng ea ka, 'me ke—ke—ke ikutloa ke batla ho le hhalosetsa eona, ua bona, 'me re ka e lika ra qoqa ka eona. Joale, ke hlile ke tšoere e 'maloa ea eona, e mehlano kapa e tselela e sa tsoa mphihlela matsatsing a 'maloa a fetileng. 'Me ka tloha, matsatsi a 'maloa mona, ho tsoma sehlora kantle mona. 'Me kena merung, 'me ke inkela potloloto le pampiri. Ua bona? Joale ha nako e ntlaufala 'me ho batla ho ela, ke itsetleha nq'a e 'ngoe ka sefate. Haeba ke sa khalehe, ke qala ke rapela, 'me e be ke, Morena o tla mpha ntho e 'ngoe, ke qala ke ngola lintlhana tsa eona, ua bona. Le tseba seo ke se bolelang; uena ha u kena boinotsing, 'me ke moo u... Ebe ke 'na enoa ke kena, ho e ngola eohle thaboleting ea pampiri. 'Me haeba ke bitsoa, kea matha ke lata thobolete ea ke sheba seo nka qalang ka sona, ua bona. Ke se sa tsoa etsahalala hona joale feela.

<sup>13</sup> Ka hona joale, ke batla joalo, ha Morena a ratile, ho bua feela... Ke ntse ke leka ho etsa... ho khaola melaetsa e meholo eo, e melele, ua bona; moo u qetang lihora. 'Me Morena o nthusitse ho etsa mosebetsi o mokhutšoane o khabane Chicago, bosiu ba ho qetela mono, metsotso e ka bang mashome a mararo. 'Me motho a fihla, ho re, "Ha kea kholoa e le ka ho uena, empa u e khonne!" Ka hona metsotso e mashome a mararo, ho tloha ho lihora tse ka bang peli le halofo, kapa tse tharo, ua tseba. Ka hona ka tšoha ke potlaka bosiusg bona ka ikoetlisa nakoana, ho se le tšoarelle halelele haholo.

<sup>14</sup> Molimo a le hlonolofatse. Ho sa tsottelehe moo ke eang teng, ha ho tulo e ka bapisoang le tabernakele ena mona le ka mohla. Ke lehae, lehae le letle. 'Me ke utloela lelapa la Weaver bohloko. Ka moena ea khabane enoa oa 'mala ea hlokahtseng, ke rapetse le eèna nakoana pele a ikela, 'me ke motho ea lokileng. 'Me o Lapeng le Molimo joale, 'me ho felile. Le tlameha ho tsamaea le hona, bohole re tseba seo. Ka hona re a . . . Morena a phomotse meeaa ea bona ka khotso, 'me tsatsi le leng re tsepile ho teana Lefatšeng lela, mono ha ho maloetse, mahlomola, kapa lefu. Ho fihlela mohlang oo, re etsetse Evangelisohle seo re ka se khonang.

<sup>15</sup> Ho bua ka tsitsipano, ke rapetse ka eona hoseng hona. U ka etsa'ng holane u se na tsitsipano eo? Ak'o nahane feela. Tsitsipano ke karolo ea bophelo. E batlile e nkhothatsa ho e nahana. Holane u se na tsitsipano, u ka itšoanelaa le popi ea likatana, u se na maikutlo. Ho se letho ho sebeletsa holim'a lona. Joaloka monna le mosali, haeba a batla ho etsa ho hong, 'me ba leka ho sebetsa 'moho (haholo Bakreste), 'me e mong a batla . . . 'Me e re ha le kópana ho . . . u fumana seo a se entseng; le eèna o a fumana . . . Ua bona, ka tšoanelo tsitsipano e le hulela haufi 'moho. 'Me motho ea u bolellang taba, "Be," ho re, "hopola mosali eo ea fetileng tlas'a tsitsipano e ngata mehleng ea bohlasoaa ba hao," kapa "monna u hutse ka falese tlas'a tsitsipano e itseng mehleng ea bohlasoaa ba hao. E re mohla e tšoaretsoeng eohle, sheba kamoo u neng u ikutloa ka eèna. Khele, u mpa feela . . ." Ua bona, u tlameha ho rua tsitsipano. Ke phetho.

<sup>16</sup> 'Me nahana feela, ka maikutlo, ho ka thoeng holane u se na maikutlo, u sa utloe bohloko kapa letho? Hola ho utloa bohloko e le ntho e sieo? U ne u sa tl'o utloa maikutlo ho hang. Ua bona? 'Me holane u se na maikutlo, e ka ba e 'ngoe ea lithusakutlo tsa hao e shoele. Ua bona? Ka baka leo, ua bona, ntho e 'ngoe le e 'ngoe e lokile leha ho le joalo. Ka hona, "Molimo, re fe mohau ho e emela," ke eona taba. Holane re ka ema ka mohau oo feela, le ho ema mono ho re, "Rea tseba mohla bophelo bona bo fetileng, bo boholo bo teng mose oane moo re shebileng ho ea teng." 'Me joale, re—re hopola hore lintho tsena tsohle, ke tsitsipano.

<sup>17</sup> Hoo, batho ba bang ba leka ho hlahisa Bokreste, hoo "u lokolotsoe metoutong. U a . . ." Che, ha u joalo. "U lokolotsoe tsitsipanong eo." Oh, che! U eketsa tsitsipano ha u ba Mokreste, hobane u ne u batla u le bohlasoaa, u sa toute ka letho, kapa ka eng kantle mono, u sa natse ketso tsa hao.

<sup>18</sup> Empa ha u fetoha Mokreste oa makoma, u ipotsa motsotsoana ka mong, "Na ebe ke khahlisa Morena oa ka? Hola nka utloa ho tsoa ho Eèna!" E u beha tlas'a tsitsipano, ho lula u itebetse. Ke sona seo u etsang seo u leng sona. Ka hona holim'a tsohle, khohlano ke leseho. Ho tsoa kamoo u e shebang kateng. Ke kamoo u e shebang kateng. Ua bona? Ha u sheba lehlakore lela feela, ho na le—ho na le . . . Ho sa tsottele hore u seha ntho

hasesane hakae, u fumana mahlakore a mabeli a eona, u a bona. Ka baka leo u batla ho bona mahlakore a mabeli.

<sup>19</sup> Ka hona tsitsipano . . . Ha ke nahana, “Oh banna, ke . . . Ebe tsitsipano ke’ng? Hola ka tsoaloa kantle ho tsitsipano.” Be, holane ke se na tsitsipano ena, nka be ke se seo ke leng sona. Nka be ke se Mokreste, mohlomong. Tsitsipano ena ke eona e nkhannetseng ho Jesu Kreste. Ua bona? Ka hona, ho ’na ebile lehlohonolo.

<sup>20</sup> Ka hona, joaloka ha Pauluse a boletse, e ka mohla tsitsipano e mo apereng kapa ho hong, o kōpile Morena ho—ho e tlosa hararō. ’Me Morena o itse, “Saule, oa Ka . . . Pauluse, mohau oa Ka o lekane.”

<sup>21</sup> A re, “Ha ho le joalo, ke tla itlotlisa mefokolng ea ka. Ha ke fokola, ke matla.” Ua bona? Ha e mpa e etselitsoe thato ea Molimo, ho lokile.

<sup>22</sup> Joale, ke Mo botsitse mohla e nkhathalitseng hampe hakana, e ne e ntšositse. ’Me O mpoleletse, lilemo tse ka bang robeli kapa tse leshome tse fetileng, O itse, “Ha e sa tla hlola e u tšosa.” ’Me ha e-so etse joalo le ka mohla. Che, monghali; se—se hlole u tšoenyeha ka eona. Kea e utloa, kea tseba e teng mono; empa ke tsoelapele feela hobane ha e sa ntšosa, ke leboha hoo haholo.

Joale, A ka be a itse, “Ha e sa tla ba teng,” joaloka ha ho ka thoe, “Ha u sa tla tšoha.”

<sup>23</sup> E etsoa ka thato ea Hae, ke e sikara feela ke re, “Kea U leboha, Morena, ke tla itsamela joalo.”

<sup>24</sup> Joale, ha re inamiseng lihlooho tsa rōna nakoana ea—ea thapelo. Na kōpo e ikhethileng ea thapelo e teng? (Ke bona lisakatuku tse robetseng mona.) Phahamisa letsoho la hao. Morena, hlohonolofatsa e mong le e mong oa bana ba Hao.

<sup>25</sup> Ntara rōna oa Leholidō, e re re sa atamela boholo ba Hao, Terone e mohau ea boreneng, hobane re kōpiloe ho tla. Re tlisoa ke memo ea Jesu Kreste. ’Me re tla ka lipelaelo tsohle tsa rōna, re li lahlela holim’ a Hae hobane O a re hlakomela. Ke matšeliso a makakang ao, ho tseba hobane O a re tsotella. Molimo o moholo oa Leholidō, ’Mopi, o a re tsotella, pōpō ea Hae. Re thabetse hono, Morena. Ke matšeliso a makakang linakong tsena tseo re phelang ho tsona, mohla ho bonahalang ho se moo re ka khonang ho—ho anya matšeliso haese Lentsoeng la Hao. Ke matšeliso a rōna ao, ke Pallo ea Hao. ’Me Pallong ea Hao, U re laetse ho tsebisa likōpo tsa rōna, ’me “Ha le kōpa eng le eng ka Lebitso la Ka, Ke tla le etsa.” Le Lipallo tsohle tsena tse khōlō: “Kōpang ’me le tla fuoa. E reng ho thaba ena, ‘Koqoha,’ ’me u sa belaele, ’me e tla koqoha.” Lipallo tsena tsohle, ’me Mono re ka anya seo re se kōpang feela.

<sup>26</sup> Matsoho a phahame, ba hloka ho hong, Morena. Uena U tseba tlhoko ea bona; e abe, Ntate. Ke teanya thapelo ea ka le

ea bona ka pel'a Hao, matsoho a ka a phahame le a bona. Mona holim'a deseke ho robetse, lisakatuku mona. Oh, kamoo batho ba nang le tumelo, tumelo e khabane, Morena . . . E bonahala e le ntho e 'ngoe eo feela eo U ntlhoholafalitseng ka eona, ho khona ho rapella bakuli. Hohle feela, nq'a efe, hohle moo ke eang teng, ntho e teng ka ho rapella bakuli. Molimo, nthuse joale. Ke rapela ka botšepehi hore Ü tle u abe likōpo tsena tsa lisakatuku tse behiloeng mona, ho batho ba kōpileng. Mohau oa Hao o lule holim'a bona.

<sup>27</sup> Morena, ha re utloisia Khaitseli Hicks o tlie le mosali mona, ea fofileng a kena tsela eohle ho tsoa nq'a e 'ngoe ho rapelloa, mofetše; 'me a batlile ho tseba haeba a ka mo tlisa koano. Kea rapela, Molimo, hore U baballe bophelo ba motho eo; aba sena. Motoala oa ka e monyenyanne, Mikie, o robetse koana o a kula o a hlatsa, ka feberu e holimō, o sa tsoa tsoa monyako. Morena, ke—ke lumela re entse thapelo ea tumelo mono hore U e emisitse, 'me ke—ke—ke U leboha haholo, ho utloa feberu e tlohela moshanyana pele ke tsoa phaposing.

<sup>28</sup> Joale, Morena . . . le ho U leboha ka lintho tsena tsohle. Joale lotho e ntšitse 'na ho bua ka Lentsoe la Hao. Re fe Lentsoe la Hao, Morena. "Lentsoe la Hao ke 'Nete." Hlohonolofatsa meea ea rōna le ho re fa e—e mohau oo re o hlokang, re tle re o hule Lipallong tsa Molimo bosiu bona, Lentsoeng, ho re baballa tsamaong ea veke ena; aba sena. Hlohonolofatsa molisa oa rōna, moea o khabane ona, mohatsa hae, bana ba hae, batikone, literaseti, le motho e mong le e mong ea kenang kapa ea tsoang mohahong ona; aba sena, Ntate. Ka Lebitso la Jesu Kreste re kōpa mahlohonolo ana. Amen.

<sup>29</sup> Joale, ke batla ho bala libakeng tse peli tsa lingoloa tsa Morena. Ke batla ho bala pele ho tsoa Bukeng ea Lipesalema, Pesalema ea 86. 'Me hape ke batla ho bala ho Santa Mattheu, khaolo ea 16, 1 ho isa ho 3. 'Me ke batla ho bala karoloana ea Pesalema ena, e seng kaofela ha eona empa ho theohela tlase ho isa temana ea 11, e batla e tlola halofo ea eona.

<sup>30</sup> 'Me batla ho tsebisa sena, ha nka rea sehlolloho, pele ke rera ka sona: *Nako Ea Kōpano Le Pontšo*. "Pontšo ea nako ea kōpano," e utloahala e le thata. *Nako Ea* (*Ua bona?*) *Kōpano*, nako ea kōpano, ho joalo hona joale. Le *Pontšo* ea nako eo ea kōpano.

<sup>31</sup> Ho—ho Pesalema, ke thapelo ea Davida, Pesalema ea 86.

*Oho MORENA, sekeha tsebe ea hao, u nkarabele: hobane ke ea malimabe ke ea lesitsi.*

*Boloka moea oa ka; hobane ke e mong oa batšepehi ba hao: thusa mohlanka oa hao, ea itšepisang uena Molimo oa ka.*

*U nkhanhale, oho Morena: hobane ke bitsa ho uena letsatsi lohle.*

*U thabise moea oa mohlanka oa hao: hobane ke phahamisetsa moea oa ka, ho uena, oho Morena.*

*Hobane uena, Morena, u molemo u mosa, u tletse lereko; ho bohle ba u rapelang.*

*Oho MORENA, sekehela thapelo ea ka, tsebe; . . . u ele thapeliso tsa ka hloko.*

*Ke u rapela ka letsatsi la ka la matsoalo: ka hobane u tla nkutloa.*

Oh, na taba eo ha e babatsehe? “U tla nkarabela.”

*Har'a melimo ha ho o tšoanang le uena, oho Morena; ha ho letho le ka lekangoang le mosebetsi ea hao.*

*Lichaba tsohle tse o li entseng li tla tla khumama pel'a hao, oho Morena; u tlotlise lebitso la hao.*

*Hobane u moholo, o etsa meeka: u Molimo u 'notši.*

Mamelang joale:

*Mpongše tsela ea hao, oho MORENA; ke—ke tle ke tsamaee 'neteng ea hao: u tlamelle pelō ea ka eohle le tšabo ea lebitso la hao. (Bonngoe! Ua bona?) . . . u tlamelle pelō ea ka eohle le tšabo ea lebitso la hao.*

<sup>32</sup> Hona joale ke bua ka kōpano le nako ea pontšo. Joale, khaolong ea 16 ea Santa Mattheu:

*Bafarisi le Basadusi ba tla, . . . ba mo leka, ka ho lakatsa hore a ba etsetse pontšo e tsoang leholimōng.*

*'Me eèna a araba a re ho bona, Ha ho se ho phirimile, lōna le re, ke . . . Le tla sa: hobane leholimō le lefubelu.*

*Ka meso le re, Kajeno le tla sithabela . . . le tla luma: hobane leholimō le bofubelu bo botšo. Lōna baikaketsi, ha lōna le tseba ho lemoha tšobotsi ea leholimō hantle; feela le hloloa lōna ke'ng ho lemoha lipontšo tsa nako ena na?*

Morena a eketse mahlohonolo a Hae a mohau palong ea Lentsoe lena.

<sup>33</sup> Joale, re bua ka kōpano ena, nako ea kōpano; pontšo ea nako ea kōpano. Ua bona, Jesu mona, palong ea Lengolo lena la ho qetela, O khalema tšebeletso ea boruti ka ho sitoa ho lemoha nako kapa pontšo ea nako. Joale, eo e sa le e le taba e khōlō bathong, ua bona, ho tseba ho lemoha *pontšo ea nako eo u phelang ho eona*; hobane Molimo o e ngola e hlakile hore mang a se khone hoe e balehela.

<sup>34</sup> Joale, ka tloaelo, ke khutlela morao ho thonaka ho bareri ba bang, bahlanka ba bang ba Morena nakong ea Bibebe (joaloka pontšo ea nako ea Nohe, pontšo ea nako ea Daniele le—le joalo, lipontšo tse fapaneng), empa ke batla ho e tlola bosiu bona ho—ho boloka nako, ho khona ho . . . Empa e sa le e mokhoa oa

Molimo, ho ba nea e—e pontšo ea tlhaho ea nako, ho re mang le mang a tsebe hantle feela hore nako e ne—e ne e le efe. 'Me Bafarisi bana ba tlamehile ba be ba tsebile nako. Ba tlamehile ba be ba tsebile nako ke efe. O boletse tulong se seng, "Holan le Ntsebile, le ka be le tsebile letsatsi la Ka." Ua bona? Ke—ke eona ntho, e—e khōlō eo re e utloisisang. Ua bona, "Ka ho se utloisise!"

<sup>35</sup> Ba buile khafetsa ka baporofeta tabeng eo, ba itse, "'Me a utloisia, ka lipono tse tsoang ho Morena. 'Me Lentsoe la Morena le tlie ho—ho baporofeta ba khale." Ua bona, ba utloisia ka Lentsoe la Morena, ka baporofeta. 'Me eaba, baporofeta ba hlahisa pontšo. Joaloka, monna ea robetseng ka lephako la hae halelele hakana, a ntano fetoha a robala ka lephako le leng. Monna e mong a tlameha ho hlobola liaparo tsa hae. 'Me oh, ba entse lintho tse ngata ho bontša pontšo eo ba phetseng ho eona. 'Me joale rea tseba Molimo o entseng maholimō le lefatše, 'me —'me oa ala mosebetsi oa Oona hore A tle a hhalose nako ea Oona ka pontšo, ona Molimo oo o sa phela kajeno. Ka hona re tlamehile joalo, ntho e 'ngoe... Re sa bona e—e nako eo re phelang ho eona, ntho e teng eo motho e mong a e tlosang mahlo, 'nqa e 'ngoe. Ua bona? Hobane Molimo o ke ke oa lumella lintho tsena ho hlahia re sa fuoe pontšo e tiileng, moo teng, re—re re tle re utloisise.

<sup>36</sup> Joale kajeno re fumana hona, taba eo tšebeletso ea boruti, re sa e baleng hantle. Ho tšoana le mohlang oo, ha ba hopola nako eo e fihlile. Bao—bao ba ikhopotse ba phela ka khotso e khutsitseng mohlang oo, 'me ka hona ba sa shebella Messia oa letho. Jesu o boletse ho Khutla ha Hae ho tla "joaloka lesholu la bosiu," mohla e—mohla batho ba sa lemocheng ho Khutla ha Hae. Empa baroetsana ba bang ba tsoile ho Mo khahlanyetsa, halofo ea bona, ba tsetse oli lamping ea bona ba itokisitse; ba ne ba shebile pontšo eo. Ke bua le bao bosius bona, ua bona, ho bao ba shebeletseng pontšo hona joale, pontšo ea ho Khutla ha Hae.

<sup>37</sup> Lipontšo tsena tse abjoang, ke Morena, li fuoa balumeli ba inotši. Ba sa lumeleng ha ba li bone. Li feta holim'a bona, ha ba e bone. Hona joale, ruri joaloka ha Lengeloi la Molimo le ka ema kalaneng ena bosius bona, ruri joaloka ha—joaloka ha ke le shebile, koana nka be ke e shebile; kapa u ka be u e shebile 'na ke sa e bone, kapa nka be ke e shebile uena u sa e bone. Joale, le tseba taba eo e khema le Lengolo; ke 'Nete e tiileng. Ba bone... Lea tseba Pauluse a oetse fatše, empa bao... ha ho e mong oa bona ea boneng Leseli leo.

<sup>38</sup> Leseli leo le ne le eme hantle mono mohla Johanne a emeng mono ka pel'a matšoelle, 'me likete li eme lebopong kantle mono, tsa tšebeletso ea boruti le—le bahlalefi, banna ba baholo. Athé Johanne o boletse, ka sebele sa hae, a bone Moea oa Molimo o theoha e ka leeba oa ba oa lula holim'a Hae, le Puo e reng, "Enoa ke Mora oa Ka ea ratoang eo Ke khahlisoang ke ho lula teng." Ha

ho mang ea Le boneng ha e se Johanne. Ua bona? Le ne le reretsoe eèena a inotsi.

<sup>39</sup> Na le lemohile kamoo e hlakileng, pontšo ea banna ba bohlale? Ba ile ba sheba, ba ne ba . . . E ne e le Baheberu. Hantle e ne e se balepi ba ma-India, e ne e le Baheberu; hobane ba ne ba ile holimō mono naheng eo ba ithuta linaleli, ho qetella thuto ea bona. Ba ne ba . . . ba shebile nq'a Jerusalema, ba tsebile ba bone linaleli tse tharō tse tsoang mocheng o mong le mong oa tsoalo ea bona—ea bona, ea Kama, Sema, le Jafeta, morabeng oo ba tsoang ho ona, e mong le e mong, ba bone linaleli tseo tselaneng ea tsona. E ne e le pontšo ho bona, ho thoe ha linaleli tseo li kolokile, Messia o lefatšeng.

<sup>40</sup> Oho, banna! Ha ho makatse ba tlide, “O kae na? O kae ea tsoetsoeng Khosi ea ba-Juda? Re bone Naleli ea Hae Bochabela, re tlide ho Mo khumamela. O kae?” Ba tsebile Messia lesea leo o ne a robetse nq'a e 'ngoe, hobane Molimo o ba neile pontšo ea nako, hore Molimo le motho ba ne ba kōpana 'moho. Kōpano e kaale, mohla Molimo o nong o Ikōpanya 'meleng oa motho! Ea seholoho, le e khōlōhali har'a likōpano tse kileng tsa etsoa, ke mohla Molimo o nong o kōpana le motho; 'me oa tēla semelo sa Oona—Oona se seholo sa Molimo 'me oa sarolla tente ea Oona oa apara botho, le ho fetoha e mong oa bona, ho ba lopolla. Kōpano. Hoo ke'ng? Hoo ho tlisitse khotso lipakeng tsa Molimo le motho ka mehla. Re leboha hakakang.

<sup>41</sup> 'Me lipontšo ha lia romelloa . . . Joale nahanang feela, motho e mong le e mong, le balepi bohle; batho, ba matsatsing ao, tšupanako ea bona e ne e le linaleli. Seboholi se ne se hloella qhooeng ea—ea tora, 'me a lule holimō mono a lebele. 'Me o bone ha linaleli tse itseng li khohletse linkhomeng se itseng, ha li ntse li feta, a tseba hobane nako e ne e le efe. Le sa hopola Lengolong, “Seboholi, nako ke efe?” 'Me seboholi se khutlile se 'molella hora. Ua bona, ba ne ba boloka nako ka linaleli.

<sup>42</sup> Joale, na ha se mohlolo ha linaleli tse tharo tsena li ne li kolohanetse banna ba bararō 'me ho se motho ea e boneng? Ua bona? Ho kolohana hantle. Joale, u ka kolohana le Lengolo hantle hakana. Ua bona? Mohla linaleli tseo li neng li kōpana, li ikōpanya senkhomeng sena, le banna ba bararō ba ne ba kōpane ka nako e le 'ngoe. 'Me u ka kōpana le Molimo hakana, Lentsoeng la Oona, hofihlela lintho tsena li fetoha linnete, 'me u ka li bona 'me ua li tseba e le 'nete. Ua bona? Pontšo ea nako! U ka e tlolisa mahlo, oa re, “Ah, bosaoana!”

<sup>43</sup> Empa ho uena ha se bosaoana. Ho uena, u kōpana le Lentsoe, 'me Ke lena. Hape ke—ke Leseli ka bottlalo, Moena Pat, ha—ha—ha—u bona pontšo ena e kōpana le molumeli. 'Me ke eèena eo ke lebisitseng taba ena ho eèena, ke molumeli, hobane mosalumele ha a e bone le ka mohla. 'Me e ka ba khalemo e kakang holane A ka fihla holim'a lefatše kajeno, boholo ba tšebeletso ea rōna ea

boruti kajeno, bo sa khoneng ho bala pontšo ena; lipontšo tseo re li balang letsatsi ka leng mona tabernakeleng, le ho bona lintho tseo. Athe ba bang ba e bala 'me ba bona mongolo leboteng, 'me koana ba bangata ba e nyemotsa feela, ebole ha ba e bone ho hang. Ho bona ha se letho ho hang; ha ba e lemohe.

<sup>44</sup> Joale lemohang, hore tabeng ena, hobane O—O supile lipontšo tsa machaba. Joale, mohla ba neng ba Mo botsa taba ena, ba ne ba batlile lipontšo; 'me O ba file lipontšo tse hlahileng. 'Me batlile ho tseba mohla bofelo ba lefatše bo tla fihla, pontšo e tla hlaha bofelong ke efe na. 'Me O ba supisitse libaka tse ngata Lengolong ka lipontšo tsa machaba, ka pontšo ea leholimō maholimōng, le ka pontšo ea lefatše; O ba file lipontšo, pontšo, lipontšo, pontšo feela molebe. 'Me e ne re ha... Tulong se seng mono O ba boleletse ka pontšo ea machaba. O itse, "E tla re ha le bona lichaba," ua bona, "li qala li thibella Jerusalema," ua bona, re tla tseba nako ea tlakotsi ea bona e haufi, "mohla le bonang Jerusalema a thibelloa ke lebotho."

<sup>45</sup> Joale, le pele ba ka etsa sena, Molimo... lefatše le ne le tlamehe ho kōpana. Tituse, mogenerale e moholo enoa oa Moroma, o ne a tlamehe ho kōpanya mabotho a hae ho thibella, ka mora hoba ba-Juda bana ba hanele pontšo e abiloeng se-Molimo ea nako ho bona. Ke mohla Titase a phuthang mabotho a hae, a tla hapa motse. Batho ba Molimo ba ne ba tlamehe ho ikōpanya pele (ba bitsoang joalo) khahlano le Lentsoe la Molimo, pele sechaba se ka ikōpanya khahlano le batho ba Molimo. Ua bona, e—e—e kōpano, ho kōpana 'moho.

<sup>46</sup> Kea lumela re phela nakong e khōlō ea kōpano. Ke ntse ke ngola mabone a mafubelu ana fatše, le matšoao a tšoelimang le ntho eohle (a basali, boitšoaro ba bona; le banna, boitšoaro ba bona; le likereke, boitšoaro ba tsona), ho bontša sehlotšoana sena, ka pelō ea ka eohle, hore ke lumela re kolohane le Lentsoe la Molimo horenge khōlō ena ea boporofeta, pejana le ho Khutla ha Morena Jesu; ho kōpana 'moho le ho itlhophisia.

<sup>47</sup> Joale, ua bona, pele Titase a hlopholla lichaba tsa... mabotho a hae 'moho, Iseraele e ikōpantse ea itlama setlamo, hore ba ke ke ba lumela Jesu e le Messia. Ba Mo hanne, ba Mo ntšetsa kantle, ba Mo thakhisa. 'Me hape, mohla ba neng ba hanelo poloko e rometsoeng ho bona, ba ikōpantse 'moho ho etsa hoo. Joale, tšoarang mohopolo oo: ho ikōpanya 'moho, ho latola Molaetsa oa hora! Ba ne ba tlamehe ho etsa joalo. Ea re ha ba entse hoo, eaba ho kena pontšo ea bochaba.

<sup>48</sup> Lichaba li qala li ikōpanya, Titase a tlisa lebotho le leholo la Maroma le Magerike ba thibella marako a Jerusalema, ba katella batho bao ka mono joale, 'me ba bolaoa ke tlala. Ba ejá makhapetla a lifate. Josefase, ranalane e moholo, o a re bolella. 'Me ba fula joang mobung. Ba pheha 'me ba jellana le bana; ua bona, e le batho ba hlanyang. 'Me eaba, qetellong, Titase, o lutse

holim'a maralla, a thibeletse Jerusalema mono, 'me—'me batho bao ba ka mono ba hopola ba etsa thato ea Molimo, ha ba bona mabotho ana a kena. Ba ne ba hanne ho utloa Mongali e Moholo eo, Morena Jesu, ho ba bolella seo.

<sup>49</sup> Ha ho mang oa Bakreste bao ea khaolelitsoeng ka mono, ka ha ba bone pontšo eaba ba tloha. Ua bona? Ba itse, "Ba leng marulelong a ntlu ba se ke ba theoha, kapa ea tšimong a boea, a se ke a nka kobo ea hae; ba mpe ba balehele Judea, le rapele paleho ea lōna e se hlahe mariha kapa ka Sabata." Hobane, nakong ea mariha, e—e maralla a letse lehloa; 'me ka letsatsi la Sabatha, monyako—menyako e koetsoe, khoro, 'me ba ka tšoasoa maemong ao. Ua bona? Re batla ho kena tabeng eo ka potlako mabapi le . . . kamoo Molimo o sebetsang lintho tseo, ha Morena a ratile.

<sup>50</sup> Lemohang joale, Eèna . . . Ba rapetse hore e tle re . . . e seng ho be joalo, Jesu o ba boleletse ho rapella hoo, 'me ha ba tšoadera le a mong oa bona ka mono. Ba balehile hobane ba behile pontšo eo leihlo, ba ne ba balehile; ke phetho se hlahileng.

<sup>51</sup> Oh, kamoo likereke kajeno li tlamehang li be li bona pontšo ea nako eo re phelang ho eona! Balehela Kalvari ka lebelo la bokhoni ba hao, ho ea Bophelong; e seng kerekeng ea mofuta, empa ho Jesu Kreste. Ikōpanye le Eèna, 'me e seng le mokhatlo o itseng kapa tumeloana e itseng ea kereke. Itlamelle le Kreste, 'me ak'o ikholise hoba ke Eèna. U ke ke ua nka eng le eng feela, u tlameha ho kholisèha hobane ke Eèna. Nako e kakang ea kōpano!

<sup>52</sup> Joale, re ba fihlela ba latotse Messia eaba ba ikōpanya ba iketsetsa lequloana, 'me ba etsa e—eona . . . khato har'a bona e reng batho bafe ba amohelang Jesu joaloka Moporofeta, ba tla khaoloa kerekeng. Le hopola moshanyana oa sefofu ea lutseng a foufetse mahlo? 'Me barutuo ba itse, "Ho sitiloe mang? Eèna, kapa ntatae, 'mè oa hae?"

<sup>53</sup> 'Me Jesu o itse, "Lebakeng lena, ha ho mang; ke hore mesebetsi ea Molimo e phethisoe, e tsebisoe."

<sup>54</sup> 'Me le hopole, ha thoe ntate le 'mè ba sitiloe ho bua. Ba itse, "Ba tseba enoa e le mora oa rōna, feela ha re tsebe pholiso ea hae e hlahile joang." Hobane ba-Juda ba ne ba laetse ha thoe mang ea Mo pakang e le Moporofeta, ba tla khaoloa.

<sup>55</sup> Empa, ua bona, mesebetsi ea Molimo e ne e le hore moshanyana enoa e se be setho sa sehlopha seo. 'Me o itse, "Joale, kea makala ha le sa tsebe moo Monna enoa a tsoang teng, athe O khutlisitse pono ea ka." Ua bona? Joale, o khonne ho e bua. Ua bona, eo e ne e le mesebetsi ea Molimo. O ne a folisitsoe, a phelisitsoe, 'me a ka—a ka e pheta ka ha a sa hlomelloa liphehelo ho tsoa hohle. Mesebetsi e entsoe ho eèna, 'me a bona ea hae . . . khetlo la pele bophelong ba hae.

<sup>56</sup> Joale, ba-Juda ba iteantse khahlano le Jesu le—le khahlano bo-Messia ba Hae, le Molaetsa oa Hae oa Messia. Re bona ho etsahala hoo hona joale, ntho eo hantle feela. Bokomonisi bo itlama 'moho ho timetsa kereke, 'me tsela e le 'ngoe eo e . . . ke ka morao hoba kereke le eona e ikōpanye, Lekhotleng la Likereke, Lekhotleng la Likereke tsa Lefatše, ho latola le ho senya Molaetsa, Lentsoe! Ba latotse Lentsoe, likereke li entse joalo! Ha ba Le amohele hoba Le ema khahlano le tumelo ea malumeli a bona; ho sa tsotolehe na ke Litšiea ea Mollo tse kae tse ka leketlang har'a ntho ea rōna . . . mahareng a batho, kapa ke batho ba ba kae ba . . . ho ka leptjoa lintho tse ngata ha kae 'me li etsahala, le lipontšo tsohle tse khōlō tseo A li baletseng letsatsi la bofelo; ba ke ke ba e phethisa.

<sup>57</sup> Ka baka leo, hona joale ba ikōpanya, 'me molisa oa rōna mona le ba bangata bo ka le bolella, bona ba balang, ho thoe bao . . . ba theile khato ea bohalaleli ba—ba—ba lefatše. 'Me eèena . . . bo okametsoe ke moreri oa Moluthere. Hoo, haeba ho hlaha koluo, e ka hlahang lebatooeng lena mona; haeba re sa ikōpanya le khato eo ea bohalaleli, kereke ea rōna ha e sa tla bitsoa kereke, 'me ba ka e sebelisetsa ntlo ea bobolokelo. Kapa haeba e mong oa baena ba rōna a bona motho ea shoang kapa ea lemetseng, 'me a leka ho mo sebeletsa lehlohonolo lefe la Moea, re ka thunyetsoa hona; hantle haholo. Re ka hlahleloa lilemo tse leshome chankaneng ea federale ka ho sebeletsa ntho efe, hobane ha re setho sa khato ena ea bohalaleli. Ana ha le bone letšoao la sebata? Ua bona? Ua bona?

<sup>58</sup> Joale, re bona nako ena ea kōpano e fihla. Ua bona? Joale, shebang! 'Me kereke e boetse e itlamahantse khahlano le Molaetsa; 'me ka ho etsa hoo, lichaba li ikōpanya le Bokomonisi ho timetsa kereke hape; hantle ka moo e entseng khetlo la pele. Ua bona? E khutla e ipheta hape.

<sup>59</sup> Iseraele e ne e tlamehe ho latola Molaetsa pele. 'Me eare ha ba latola Molaetsa, eaba sesole, bophelo ba bochaba bo iteanyana 'moho (ba lichaba tse ling), ba kena ba timetsa kereke. 'Me kajeno, ba latotse Molaetsa oa Morena Jesu, 'me ba O hanne. 'Me joale, ke eona nako eo Bokomisi bo ikōpanyang le lefatše khahlano le kereke. Ua bona, e tlameha joalo. Joale, ho thata ho rialo.

<sup>60</sup> Ho ne ho le thata hob a-Juda ho lumela. Ba itseng, "Joale tloong, baena, re bona seo—seo Molimo oa rōna—oa rōna o na le rōna, 'me ka hona re tla—re tla kena tempeleng. 'Me joale re tla rapela, 'me ntate ea halalelang *Sekete-kete* le ntate ea halalelang *Sekete-kete* bat la re etella pele ka thapelo. Koalang khoro!" 'Me eaba Titase oa thakhisa, a lula hantle mono selemo kapa ho feta. Ua bona, ho lebela hantle, 'me a ba bolaisa tlala. Ho se e aka tsoelang kantle ho motse har'a bona; 'me ba shoa, ba bolaao ke tlala. 'Me eitse ha a ken aka mono 'me a heletsang marako,

mali a phalla joaloka linoka tlase mono a bolaile tsohle tse leng ka mono.

<sup>61</sup> Joale, Lengeloi la Morena le porofetile taba eo, morao Testamenteng ea Khale, le ho ba bolella se tlang ho etsahala. 'Me bareri, ba tšebeletso ea boruti, ba tlamehang ho tsebisisa mabapi le taba eo le ho bolella batho ka eona, sebakeng sa hoo, mohla Jesu a emeng har'a bona, ke ha ba bile bas a Mo tsebe; le ho leka ho etsa e—e . . . boselamose ba—ba leoto la moutloa, "Re bontše mohlolo, ha re boneng ka moo—ka moo o etsoang kateng! Re etsetse pontšo." Ua bona?

'Me O itse, "'Na . . ." Khele, O entse lintho tse ngata hakana, 'me koana ha ba e bona. Ua bona? 'Me eitse hobane ba Mo latole joaloka oa bona . . . Molaetsa oa letsatsi leo, ba latotse Molaetsa oa letsatsi leo.

<sup>62</sup> Ba sitiloe ho bona pontšo ea letsatsi leo. 'Me pontšo ea—ea bopofeta ba Bibele e bonahalitsoe pel'a bona, 'me ba itse, "Ha re keneng joale!" Bao e ne e le banna ba halalelang. E ne e le banna bao u ka sitoang ho supa bophelo ba bona ka monoana. Ba ne ba ke ba eba seo, 'me hape—'me hape e—e—e moprista. Moprista a ka bolaoa, a ka tlepetsa ka majoe a shoa ka baka la nthoana e nyenyane. Ka baka leo a tlameha ho phela bophelo hloekileng, bo halalelang. A ke ke a etsa joalo, hobane o ne a tlepeletsa eng le eng. 'Me joale e ne e le banna ba baholo, 'me e le banna ba halalelang mahlong a batho, 'me leha ho le joalo ba kene ba re, "Joale, re tla . . . Re fumane Molimo, Molimo O esale a ena le rōna ho haola le mengoaha eohle. Re tla tempeleng ea Oona e halalelang." E ne e le tempele e halalelang ea Molimo! Empa, u a bona, O ne a hannoe tempeleng ea Oona e halalelang. Ua bona? "Re tla kena tlung ea Morena. Joale lōna Baheberu bohole le tseba hobane re sechaba se khethiloeng, le rōna bana, re fihlile mona. 'Me Molimo ke Molimo oa rōna; Molimo oa Abrahama, Isaaka, le Jakobo. O na le rōna. O tla re loela ho Baflista bao ba sa bollang kantle mono (kamoo ho etsahetseng), Maroma ao le Magerike. O tla re loela nthong eo. Ha re keneng tlung ea Morena!"

<sup>63</sup> E utloahala e hlabosa; empa ba ne ba entse'ng? Mohahi oa ntlo o ne a le teng ka mono, ka sebopoho sa 'metli ea tlase oa Mogalelea, 'me ba ne ba Mo nyatsitse; athe Molimo o no o Mo nētēfalisitse e le Morongoa oa Oona oa hora, le Lekala. 'Me ba E nyatsitse. Ka hona lithapelo tsohle, botšepehi bohole, lihlabelo tsa bona tsohle ke ha li sa bolele letho ho Molimo. Ba ne ba entse hoo! 'Me Molimo oa lumella lebotho le leholo ho kōpana le ho e senya.

<sup>64</sup> 'Me rea bona kajeno, likereke ka mekhatlo ea malumeli le joalo, li nyemotsa Lentsoe la Molimo. Ha ba batle ha u ba bolella ka lintho tsena, 'me mahlale a ka e paka ka litšoantšo le ka ntho e 'ngoe le e 'ngoe, 'me le joale ha ba batle ho amana le Eona ka letho. Ka baka leo bokomonisi bo ntse bo ipopa ho e senya, hantle

feela kamoo Titase a entseng, 'me Bibele e ba boletse bat la e phethisa. Ehlide bo!

<sup>65</sup> Joale, na le bona moo re phelang teng? Nako ea kōpano, nakong eo re bonang lintho tsena li kōpana. Oh, hobaneng re sitoa ho bona lintho tseo? U ka khona—u ka sheba mona Lengolong 'me ua bona moo A tsepisitseng taba eo, seo A neng a tla se etsa. Joale, re e bona e etsahala. Re bona seo A tsepisitseng ho se etsa se le ka har'a kereke; re e bona e etsahala. Re bona lichaba li kōpana 'moho. Re bona mekha e ikōpanya 'moho. Re bona likereke li ikōpanya 'moho. Ke nako ea kōpano. Ke hora ea kōpano. Oo ke moea oa mongoaha, "Re tlameha ho kōpana." Sohle seo u buang ka sona se tlameha ho hlophisoa; esita le'muso o ke ke oa e amohela.

<sup>66</sup> Ua tseba, joaloka moahi... Ha ke khone joaloka moahi, joaloka moahi oa Linaha tse Kōpaneng, feela ke—ke... u ka mpha cheke ea didolara tse hlano 'me nke ke ka iteta sefuba ho ngola lebitso la ka holim'a eona. Hmm. Ua bona, nke ke ka khona ho etsa hoo. Ua bona, ke nako ea kōpano. E tlameha pele ho feta setlamong sa mofuta, 'me setlamo seo ke sona se hlahisang letšoao la sebata. Ua bona? Ke nako ea kōpano, 'me e sebeletsa hantle nq'a eo. U ka e bona le ka mahlo a hao a nama feela, haeba u ka e sheba. Ke nako ea kōpano, moo ntho e 'ngoe le e 'ngoe e kōpanang 'moho.

<sup>67</sup> Bona Bajuda—Bajuda ba ikōpantse khahlano le Jesu, joaloka—joaloka Messia oa bona. Ka hona, re bona se hlahileng. Hona joale re bona hona hoo, bokomonisi bo kōpana ho senya kereke, ka mora hoba kereke e ikōpanye Lekhotleng la Likereke tsa Lefatše le ho leka ho senya Molaetsa, Lentsoe la Molimo. Ba leka ho Le falatsa. Seo ba tlamehang ho se etsa feela ke ho thea lekhotla, hobane ba arohane; sehlotsaona mona, Bamethodise, le Mabaptise, le Maluthere, le Mapresbeteriene, Kereke ea Kreste, le joalo ka tsela eo. Ha ba khone ho etsa letho, hobane enoa o tla ema khahlano le enoa, enoa aeme khahlano le eane, thuto ea bona e fapane hakaale ka bochabela ha bo arohane le bophirimela. Ua bona, ha ba khone ho e phethisa. Empa hang ha ba le 'moho, tlas'a hlooho e le 'ngoe e khōlō, ba e khonne. Ba e tšoere ke hona.

<sup>68</sup> Ke ka moo Makatolike a kōpaneng hakaale, Roma e Katolike, hobane ba kōpane, bao ba... Roma ea Katolike e bongateng; Bagerike le Makatolike a mang ha a—a mangata hakaale ka Roma e Katolike. Joale li kōpana 'moho, 'me ke ka baka leo li emang 'moho. Ho sa tsottelehe se etsahalang, mopapa eo ke hlooho ea ntho eohle. Ua bona? 'Me ho sa tsottelehe seo mang a se buang, "Ha a tlaile; ke—ke—ke moemeli oa Molimo, ke phetho; o hlahlama Molimo; o rena holim'a lihele, Leholidō, le pelekatori." Ua bona? Ha ho letho le ka etsoang lebakeng leo; sohle seo a se buang, se tlameha ho etsoa.

<sup>69</sup> Joale, Maprotestanta a ntse a iketsetsa hlooho ea mokhalo oo, ka ho tšoana. 'Me na Bibele ha e a tlaleha setšoantšo sa sebata se le teng? Setšoantšo ke'ng? Ke ntho e tšoanang le eona, e tšoantšisang. Ke eo, ho a tšoana. Ke eng? Ka ho ikōpanya ha bona 'moho, 'me ona ke moea oa mongoaha, ke *kōpano*.

<sup>70</sup> Ho kōpana 'moho joale, ho leka ho senya Molaetsa. Ba ka O senya joang? Ba ne ba ka senya Lentsoe la Molimo joang? Ba ka Le etsa ntho e se nang matla, e se nang matla, ka ho nka meetlo joaloka ha ba entse morao mane tšimolohong, le ho etsa Lentsoe la Molimo ntho e se nang matla. Ua bona, ba re, "Oh, hoo ke... Hantle-ntle, holim'a tsohle,..." Na le bona moo mosali enoa oa mosalumele a lekang... eēna... ke lebala lebitso la hae joale; hola nka le bitsa feela. Eēna... Ke leka ho nahana ka ba bangata hakana.

<sup>71</sup> Ke nahanne ka Mof. Nation enoa letsatsi le leng; e ka re ho ka tsoha e mong ea joalo. Eēna ea keneng litameneng a heletsa wiski, a tabola matšoao le tsohle joalo. Hore'ng ho sa tsohe mosali ea joalo, ea tsoelang kantle mona a tabola lifoto tsena tse tsotseng tsa basali bana ba morabe oa habo bona, le lintho tse kang tseo? Hoo, ha ba sa na eona hape.

<sup>72</sup> Joale, empa mosali enoa, oa mosalumele, ea boletseng ho re—ho re "ha se molaotheo ho Bibele, ha e baloa likolong tsa bohole," le lintho tse kang tseo.

<sup>73</sup> Joale bao hape, na le boetse le lemoibile, ba ntse ba leka ho bolela joale, le bahlopholli ba baholo ba Lengolo, ba itse "boporofeta bo bongata bo porofetileng Bibeleng bo fositse kannete, 'me ha bo eso etsahale.'" 'Me le utloile taba eo la e bala. 'Me ba ntse ba leka ho bua eng le eng; ua bona, ba ntse ba leka ho senya matla a Lentsoe leo. Hola feelsa ba ka senya 'me ba Le fapanyetsa ka tumeloana kapa ka ntho e 'ngoe e kakatletsoeng ke batho, e bonahalang mahlong a bona e le molengoana ho Lentsoe, ba Le senya ka moetlo oa bona—oa bona. 'Me ba ntse ba leka ho senya Lentsoe la Molimo joalo, ka lipolotiki tsa mokhatlo oa bolumeli.

<sup>74</sup> Joale, kereke e 'ngoe le e 'ngoe e theile lipolotiki tsa eona. Kereke ea Kreste e fupile tsa eona, kereke ea Bokreste e fupile ea eona, le Mabaptise, le Bamethodise, le Presbeteriene; kaofela ha bona ba tšoere lipolotiki tsa bona tse fapaneng. Joale, ba ntse ba ritsa mono hobane ba arohane. Ua bona, e ne e ke ke ea etsoa pele, ba tlameha ho e etsa hona joale. Ua bona, ena ke nako ea kōpano, 'me joale bohole ba e teanya 'moho le ho e tlamahanya ho bona seo ba ka se fumanang ho eona. Khele, e ka re ho pheha senkhoa sa bohobe ka nama ea pere, le matlakala a tsoang moqomong, le sohle seo ba se teantseng 'moho; le ho e luba 'moho, le ho lubella litapole tse 'mala tse bolileng le lintho 'moho, le ho bona seo u se sibollang. Ruri ha ke batle letho la eona. Che, monghali! Ba ntse ba sebetsa joalo. Ua bona, ba amohela

batho ba lumelang Jesu e le khopolotaba, kereke e lumelang Jesu e le khopolotaba; e 'ngoe, ba bang ba lumela hobane E ne e le moporofeta.

<sup>75</sup> E mong o re, "Matsatsi a mehlolo a fetic."

<sup>76</sup> E mong o itse, "Ntho e joalo e ka ba teng."

<sup>77</sup> 'Me sena sohle hammoho; 'me Bibebe e itse, "Ba babeli ba ka tsamaea 'moho athe ha ba utloane?" Ua bona? Joale, kōpano ea bona ke ea mohlahloe oo. 'Me ba hloma ntatehali ea itseng ea halalelang ho e okamela, 'me mono u fumana setšoantšo sa sebata, hantle feela seo Bibebe e se buang. Joale ba hlomme moreri oa Moluthere, hlooho ea eona. Be, re bona nako ea kōpano e fihlile. Ho a tšoana joale, Bokomonisi le tsohle li kōpana 'moho; lefatšeng, 'me le kahar'a kereke le joalo-joalo, ho kōpana 'moho.

<sup>78</sup> Sheba tlhaho. Oh, banna! Tlhaho, ha u ka sheba tlhaho, e sebetsa ka ho tšoana. Tlhaho ke k'halendara ea Molimo ea lipontšo. Na le tsebile hoo? Jesu o ba boleletse ho beha tlhaho leihlo. Leoatle le tla rora, ua bona, 'me ho tla hlaha lintho tse fapaneng, le lithothomelo tsa lefatše libakeng tse ngata, khohlano ea lichaba, lipontšo leholimōng, lipontšo holim'a lefatše, hohle ho tla hlaha lipontšo tsa nako e tlang ena.

<sup>79</sup> Beha maru leihlo. Pele maru a ka fehla sefeko sa pula, na le tseba mokhoa oo e etsoang? Maru a manyenyane a teana, ho bōpa leru le le leng le leholo. Be, lena le butšoeloa ke bohashana ba moea, le leng lena le butšoeloa ke boshasana ba moea, 'me 'ohle a fokoa hammoho, 'me a ntano fehla leholiotsoane. Ua bona? A kōpana pele ho fehla sefeko; a tlameha joalo.

<sup>80</sup> Behang matata le makau leihlo ha a kōpana 'moho pele a falla a tsoa naheng ea 'ona. Ua bona? A kōpana 'moho. U ka a bona a fofa a tloha letšeng lena ho ea letšeng lane, ho tloha mona ho ea mane, ao 'ohle a kōpana 'moho. A ntse a kōpana, a itokisetsa ho thakhoha a tloha. Ua bona, e mpa e le feela . . . eo ke tlhaho, 'me Molimo o hlolile tlhaho, 'me tlhaho e sebetsa ka leano la Molimo. Ke molao, molao o sa ngoloang oa Molimo, tlhaho eo e sebetsa ho latela molao oa Hae.

<sup>81</sup> Ho a tšoana, ha ke bua tšebeletsong ea lepato, lero le theohela lebitleng, botebong ba motso oa sefate, le robala mono ho fihlela tsoho sehleng sa selemo. Ke molao oa Molimo. Ha ho bohlalefi bo ka theolelang lero tlase mono; u ka sitoa ho le monya, u ka sitoa ho le hama. Ha ho mokhoa oa ho e sebetsa betere ho feta Molimo. Molimo o tšoere tsela e phethehileng. Ka baka leo lehlaku ha le foforeha, ke moo A romellang lero tlase lebitleng le ho le pata. Joaloka Jobo ha a boletse, "U mpate lebitleng khalefo ea Hao e be e fete." Ua bona? Le theohela tlase mono hobane ke molao oa tlhaho, pele serame se khetheha. Sheba mahlaku joale ha a qala a foforeha. Hobaneng? Ke molao oa tlhaho oo.

<sup>82</sup> Matata a khobokana, le leng le le leng la ona, 'me a teela moetapele hare. Kahare ka mono a tla tseba ka tsela e itseng,

ha ke tsebe na a khona joang, empa a tseba mokokoana o ikhtethileng oo e le moetapele. 'Me thaka leo, a tla bokana 'ohle a mo teele hare, a phahamele sebakeng. 'Me o tla...ha a eso tlohe letšeng leo le ka mohla joale, empa o tla toba Louisiana kapa Texas ka kotloloho, tšimong ea reisi. Ua bona, pele a thakhoha, a falla lehaeng la ona moo a hlahetseng teng selemong seo, a bokana 'moho. Amen! Ke moo; ho teela moetapele oa ona hare.

<sup>83</sup> Bothata ba eona ke bona, ka motho, ha a tsebe moetapele oa hae. E, monghali. Ba bokanelo mokhatlo oa bolumeli, ba tla bokanelo bishopo kapa monna, empa ha ba batle ho teela Moetapele hare, Moea o Halalelang Lentsoeng. Ua bona? Ba re, "Oh, be, nka tšoha ke lahleheloa ke kelello; nka tloha ke hata ka leoto le phoso." Ohhhh, ke moo! Ho ka thoeng ha letatana le ka re, "Ha ke rate mokhoa oo a hlophisang masiba a hae. Ha ke kholoe ke tla mo sala morao." U tla hoamisoa ke mohatsela a shoe. U tla khaioletsoa holimō mono, haeba u sa nyolohe le—le sehlopha ha se tloha. Sea iphutha ho bokana 'moho, 'me tlhaho e sebetsa joalo.

<sup>84</sup> Matata a phutheha hammoho, a teela moetapele oa ona hare; a etsa hona hoo.

<sup>85</sup> Na u bone senkhome sa linotši? Linotši li ikhobokanya 'moho, pele li bokana, li teela mofumahali oa tsona hare. Ke hantle. 'Me moo a eang teng, le tsona li ea teng. E! Li etsang? Pele li kōpana pele lia khobokana. Hantle feela; tlhaho e 'ngoe le e 'ngoe!

<sup>86</sup> Hlapi e bokana 'moho pele sehla sa selemo se thoasa. Kantle koana har'a leoatle, u ka li fumana; tse khōlō tseo... seo re se bitsang "humpys," salmone. E tla re ha li fihla holimō mono, pele li matha li kena, u tla li bona ka mashome a likete, kantle kahar'a leoatle, li likoloha le ho likoloha; metsing a letsuai, empa ka tšoanelo ke hlapi ea metsi a se nang letsoai. 'Me ke tsena li tsoa metsing a macha ao, ho kenela sehla sa ho behela mahe. Li nyolohela mono lia behela, lilemong tse ling le tse ling tse batlileng hoba tse 'ne, 'me hang ha li behela li a shoa. 'Me li tseba li ea koo ho shoa, koana u ke ke ua li thibela ka letho. Li tla tlola lilere tsa lilihapi le ntho eohle esele, ho nyolohela koo, athe li tseba li ea lefung la tsona. Empa li laoloa ke molao oa tlhaho, li tseba li nyolohela mono 'me li behela mokoting, li ntano shoa. 'Me ho fihla tse nyenyane, mohlang oo li kōpanngoa ke ho hong, li kena kantle koana leoatleng. Ke ho kōpana! Ke molao. U ke ke ua sitisa molao oa Molimo.

<sup>87</sup> Lichaba lia—lia pshatleha, re li bona li tlameha joalo ho—ho etsa sena ka nako ena. Re khatong ea tsieleho ea lichaba. Re bona lichaba li pshatla setsoalle. Selemo le selemo, re fumana sechaba *sena* se metsoa ke bokomonisi; *sena* se metsoa ke bokomonisi. 'Me hantle mona sechabeng sa rōna, se chekiloe likhotlela tsa bokomonisi, 'me bo tla hapa! Ua bona, bo tla etsa joalo, ha ho

tsela ea ho bo thibela. Hobane'ng? Ka lona lebaka leo le beng le sa tl'o thibela Titase. Batho ba hanne Molimo le Lentsoe la Oona. E, monghali, ba tla etsa hoo, 'me re e bona e kene mocheng hantle.

<sup>88</sup> 'Na, ka tloaelo, ke nka lihora tse 'maloa; ke se batla ke qetile metsotso e mashome a mararō, hona joale. Ua bona? Empa ho kenya hohla hohle, kea hatella. Le ka e hlahlobisa ha le fihla hae.

<sup>89</sup> Lemohang, hona joale ba kōpana. U re, "Moena Branham, na ke 'neta?" Ba ea kenela Ntoa ea Meggidone; ke hantle seo ba ea se etsa. Ua bona? 'Me hantle hona joale ba kōpanela morero oo. Lebaka leo re fumanang Machaba a Kopaneng le ntho eohle eo re e fumanang. Lefatše la Bophirima le ikōpanya khahlano le Lefatše la Bochabela, bokomonisi le tse joalo, hohle ho kōpana 'moho. Likereke li kōpana 'moho. Ntho e 'ngoe le e 'ngoe e bonahala e ikōpanya. Ho kōpana, ho ikōpanya 'moho, re bona seo.

<sup>90</sup> Hape, mehleng ena ea kōpano ea sechaba, lipontšo tsena, lipontšo tsa sechaba, re bona kantle koana mona lefatšeng, lithothomelo tsa lefatše libakeng tse ngata, lintho tse fapaneng lia kōpana; ho kōpanya lefatše 'moho, ho kōpanya batho 'moho, likereke tsohle 'moho, lintho tsena tsohle. 'Me nakong eo kōpano ena eohle e ntseng e tsoeletse, kōpano e 'ngoe e ntse e etsahala. Amen! Ke sona seo ke batlang ho le supisa sona joale.

<sup>91</sup> Molimo o ntse o kōpanya Monyaluo oa Hae. O ntse a phutheha, ho tloha Bochabela le Bophirimela, le Leboea le Boroa. Nako ea kōpano e teng, 'me e etsahala hantle hona joale. Ebe E kōpana ka morero ofe? Hloibili. Amen! Molimo o ntse o Mo hlophisa. E, monghali, ho kōpana! Ebe O ntse a kōpana le eng? Le Lentsoe! "Hobane maholimō 'ohle le lefatše li tla feta, empa Lentsoe la Ka le ke ke la feta." O Ikōpanya le HO RIALO MORENA ho sa tsottelehe seo mokhatlo ofe oa bolumeli kapa seo motho ofe a se buang. O ntse a Ikōpanya. O ntse a hlophisa. Hobaneng? Ke Monyaluo. Ke hantle. 'Me O Ikōpanya le Monyaloi oa Hae, ua bona, 'me Monyaloi ke Lentsoe. "Lentsoe le ne le tšimolohong, Lentsoe le ne le ho Molimo, 'me Lentsoe e ne e le Molimo. 'Me Lentsoe le ne le etsoe nama la aha har'a rōna."

<sup>92</sup> 'Me Kereke le Monyaluo le Lentsoe ba eba bang, ho fihlela Lentsoe ka Bolona le sebetsa mesebetsi ea Monyaloi. Amen! U a e bona? Kōpano! Ha e sa hlola e le, "Ho ingolisa kerekeng"; ha e sa hlola e le sena, empa ho baleha ntho eohle le ho itlamella ho Jesu Kreste. Ua bona? Ke nako ea kōpano. Molimo, o kōpana Monyaluo oa Hae 'moho, ho E khutlisa; hantle feela. Ho Kōpana Mantsoe a tšepiso ea Hae.

<sup>93</sup> Bathesalonika ba Bobeli, khaolo ea 2; E re, khaolo ena ea 5 e re, "Bahalaleli ba robetseng leroleng la lefatše ba tla tsoha. 'Me rōna re tla kōpana le bona (ba phelang, le bao e sa le ba shoele), ba tla kōpana le pele re fihla Mono," hobane Monyaluo o tla be a phethehile mohla A fihlang Mono. Ba phelang, ba ntseng ba

ikōpanya le Lentsoe, le bao ba iketseng ba se ba entse joalo; 'me ntho eohle E a phutheha, ho bopa kōpano e le 'ngoe e khōlō ea kōpano pele ho falleloa holimō Mono. Amen!

<sup>94</sup> Bokomonisi bo tlameha ho hlaha, lintho tse ling tsena li tlameha ho hlaha, 'me kereke e tlameha ho ikōpanya kantle koana, mohla tseo... le lichaba kantle mane bakeng sa Lekhotla la Likereke tsa Lefatše; 'me Monyaluoa o tlameha ho Ikōpanya tlas'a Lentsoe la Molimo. Ho etsa hoo, Molimo o theotse pontšo ea Leholidō le lintho, e pakelang Kereke, joaloka ha A entse ho sechaba. Amen.

<sup>95</sup> Molimo; nakō ea kōpano! E, monghali. Oh, banna! Joale, u a hopola, joale, kōpano ea Lentsoe e teng (ho kōpana hape), ho busetsa "Tumelo e kileng ea neoa bahalaleli ka nako e 'ngoe." Ho busetsa! Hore taba ena e ne e ka etsoa letsatsing lena feela. Eona feela nako eo e neng e ka etsoa ka eona ke hona joale. Ha eso futuheloe nq'a efe esele; ba khelohetse lehlanahlaneng la mokhatlo oa bolumeli. Empa joale, ha se setho sa lehlanahlanla la mokhatlo oa bolumeli, hobane ke nako ea ho kōpanya banna le basali ba morabe o mong le o mong, 'mala o mong le o mong, tumeloana ka 'ngoe, ntho e 'ngoe le e 'ngoe tlas'a Kreste ka Kolobetso ea Moea o Halalelang le ho khutlela Lentsoeng.

<sup>96</sup> Nako ea Kereke ho kōpana! Oh, banna! Ho kōpanya Lentsoe ka leng le qhalantsoeng hohle ke mekhatlo ena: ho qala mane Nicaea, Roma, mohla ba hlophisang kereke ea pele, ba hlophisitse Luthere, ba hlophisitse Wesele, ba hlophisitse likereke tse ling tsohle. 'Me ho etsa hoo, ba tlameha ho amohela tumeloana, 'me ha Molimo o romela taba ese, ha ba khona ho E amohela. Ka baka leo, e ke ke ea etsoa ho fihlela hona joale. 'Me Molimo o tsepisitse, matsatsing a qetelo, ho thoe "Tumelo ea bontate e tla busetsoa ho Monyaluoa hape," ho thoe sena se tla etsoa, 'me e ke ke ea etsoa nakong efe haese nakong ena. Shebang pontšo e tsoang Leholidōng, joaloka Tšiea ea Mollo e leketlang har'a rōna, ka lipontšo le meeka ea Morena Jesu Kreste. 'Me ha A ntse a buisana le rōna, ha E hlolehe ho otla botsekeng ka ho phethahala ka mehla. Amen! Ka hona re bona moo re emeng teng. Nako ea ho kōpana!

<sup>97</sup> Re bona lichaba li kōpana, re bona lefatše le kōpana, re bona bokomonisi bo kōpana, re bona likereke li kōpana; re bona Molimo o Ikōpanya le Monyaluoa oa Hae, hofihlela Eēna le Kereke e le ntho e le 'ngoe. Alleluia! Joaloka piramide mono. Hantle! Ba ikōpanya 'moho; Molimo o a kōpana! Hobaneng? Lekhale pele, ho qala ka mongoaha oa kereke e qalang, Tšiea ea Mollo ha eso eme har'a batho. Lekhale pele, ho tloha mohla mongoaha kereke o qalang, ha ho moo re kileng ra bona lintho tseo re li bonang kajeno. 'Me taba ena e khontšitsoe ke ha Molimo o romela Litiiso tse Supileng le ho re nea pontšo ka Eona, le ho romela Mangeloi a supileng ho tsoa Leholidōng; le ho khutla ho busetsa Lentsoe le hasakaneng leo ka mekhatlo eo ea malumeli,

le ho boela e tlamahangoa morao Lentsoeng la Molimo, ho theola Moea oa Hae o Halalelang.

<sup>98</sup> Jesu o boletse, “E ka re ha le lula ho ’Na le Lentsoe la Ka le lula ka ho lōna, le ka kōpa seo le se batlang, le tla se etsetsoa.” Ho kōpanya Monyalua morao le Lentsoe hape, e leng Molimo. Kereke le Lentsoe, e seng Kereke le tumeloana, Kereke le Lentsoe; Monyalua le Lentsoe ba kōpane ’moho. Oh, banna! Ha se le e . . . Ho busetsa eng? Eona Tumelo ea mantlha ea bontate ba pentekosta, ua bona, e kileng ea qhalangoa ke sehllopha sa Luther. Ha se Luther ka seqo sa hae; ha se Luther, ha se Wesley, ha se bathei ba baholo bao. Empa ka mora ho falla ha bona, eaba ho hlaha kereke, ’me bao . . . seo ba se entseng ka ntho eo mohlang oo, ba bopile mokhatlo ka eona. Ba amohetse litumeloana le lintho tse joalo, ’me eaba ba tloha. ’Me le ba shebe kajeno, joale ba kenetse Lekhotla la Likereke tsa Lefatše.

<sup>99</sup> Joale, ua bona, empa matsatsing a ho qetela, ua bona, hona joale re bona ho etsahala lintho tse eso etsahale pele le ka mohla. Ua bona, ke pontšo ea Molimo, ’me kōpano ena eohle ke pontšo ea nako. Joale, re batla ho e shebisisa ka kelohloko le ho ikholisa hore rea e tšoara. Ho tlohela . . . ba tlohela Lentsoe la ’nete ho inkela mekhatlo ea malumeli; ho amohela tumeloana le likakanyo tsa banna ba fapaneng sebakeng sa ho nka Lentsoe.

<sup>100</sup> Tšenolo 10 e itse, “Molaetsa oa lengeloi la bosupa.” Joale hopolang, ke hantle ho Literompeta tse Supileng, ’me ho fumanoa mangeloi a supileng a letsang Literompeta tse Supileng. Re kena ho eona khetlo le latèlang. Empa le hopole mono, ka ho qoholeha E itse, “Oa lengeloi . . . ,” e seng Terompeta ea lengeloi la bosupa, empa “Molaetsa oa lengeloi la bosupa.” Ua bona, e seng lengeloi la Terompeta, lengeloi la Molaetsa! Ua bona, lengeloi le letsitse terompeta feela, lengeloi leo la bosupa, lengeloi la Terompeta. Empa ena e re, “Matsatsing a Molaetsa oa lengeloi la bosupa,” ua bona, mohla Molaetsa oa lona o felileng. Ua bona, oo ke Molaetsa oa mongoaha oa kereke. Nakong ena, o tla . . . Molaetsa, e seng Terompeta, ’me “sephiri sa Molimo (se ngotsoeng Lentsoeng) se loketse ho phetheha.”

<sup>101</sup> Joale le shebe na re phela letsatsing lefe! Le shebe Litiiso tseo, ka moo e takileng Lentsoe leo la Molimo le qhalaneng, seo Luther le bao bohle, seo bahlabolli ba baholo bao ileng ba tsoa; ho khutla hantle le ho e supa ka har'a Bibele, moo ba tla ema teng; monna e mong le e mong tulong sa hae hantle, seo a neng a tla se etsa le se neng se tla hlahela kereke; seo a neng a tla se etsa, le se neng se tla hlahela kereke; lintho tsena tsohle tseo a li siileng. ’Me eaba, letsatsing la qetello, mohla re sa tsebang letho ka eona, ra bolelloa pele se neng se tla etsahala; esita le lipampiri tsa litaba le lintho tsa e thonaka, le ho theoha hantle le ho e senola le ho e tlamahanya le liphiri ’moho. Amen! Moena, ho ’na e tsoile ka mahetla! Taba eo, ho ’na, e otolla Lentsoe. Amen!

Ha ke tsotelle seo—seo, kapa, ke tsotella seo batho ba se buang, ba se nahanang, ke hantle, empa ho 'na ke 'Nete.

<sup>102</sup> Joaloka banna ba bohlale, ba tsoang Babilona, ba mohoo, "O kae Eo, ea tsoetsoeng Khosi ea Bajuda? O holim'a lefatše, hona joale. Re tlameha ho Mo fumana." Ke hantle. 'Me ke lumela A atametse ho khutla hakana hoo nka reng, "Bonang, Monyali ke eo a e tla! Ke utloa mohoo oa khitla ea bosiu!" Amen! Re nakong ea bofelo hantle. Oh, banna, hora eo re phelang ho eona. Lemohang. Ua bona?

<sup>103</sup> Letsatsi le le kakang! Re phela nakong e kakang, sephiri se seholo sena sa Molimo se a phetheloa; ho taka Bomolimo, ho bontša seo Bo leng sona; kamoo mekhanyana ena, e kileng ea kheloha ea Mo etsa *sena*, le motho e mong a Mo etsa *sena*, le motho e mong o Mo entse *sane*. Empa Lengeloi la Morena la theoha la utulla mekha ea bona eohle, ho utulla 'Nete eo eohle ea eona, le ho E hlahatsa. 'Me ke Eo, ka ho phetheda kamoo E ka hlahang, ha ho moo u ka eang teng. Ke Eo, ke seo A leng sona. Ua bona, peō ea nōha, lintho tsena tsohle—tsohle tse fapaneng tseo esale e le mohlolohar'a batho. Ua bona? Ke eng? O ne a... Ena ke pontšo ea ho eng? Ho kōpana!

<sup>104</sup> Ebe O itseng ho Malakia 4? Ho tla busetsoa! Ho busetsa Tumelo ea mantlha ea pentekosta, morao bathong ka Molaetsa o tšoanang oa Pentekosta, pontšo e tšoanang ea pentekosta, bopaki bo tšoanang ba pentekosta, Molimo o tšoanang, Matla a tšoanang, thuto e tšoanang, ntho e 'ngoe le e 'ngoe ka tšoanelo, ka nētefatso ea Tšiea ea Mollo e tšoanang le e otlieng ea ba ea liha Pauluse tseleng e theohang, a theohela Damaseka e le har'a rōna kajeno, ho etsa tseo A li entseng letsatsing leo. Ho kōpana!

<sup>105</sup> Re bona lichaba li kōpana, re bona lefatše le kōpana, re bona likereke li kōpana. Re bona Monyaluo a kōpana, ho kōpana le Lentsoe. Hobaneng? Lentsoe ke Molimo. 'Me joalo ka Lentsoe... Joaloka ha Monyali (e le Lentsoe), le Monyaluo (e le moutloio a Lentsoe), Ba kōpana 'moho Kōpanong. Ba kōpana joaloka lechatong. Ua bona, Ba kōpana ho itokisetsa lechato, 'me Ba—Ba eba Bang. Lentsoe le fetoha uena, uena u fetoha Lentsoe. Jesu o itse, "Ka letsatsi leo le tla e tseba. Sohle seo Ntate a leng sona, Ke sona; le sohle seo Ke leng sona, le lōna le sona; 'me sohle seo le leng sona, le 'na Ke sona. Ka letsatsi leo le tla tseba hobane Ke ho Ntate, Ntate o ho 'Na, Ke ho lōna, le lōna le ho 'Na." Ua bona? Ka "letsatsi leo." Letsatsi lefe? Letsatsi lena! Re fumana liphiri tse khōlō tsa Molimo li senoloa. Oh, ka moo ke ratang seo!

<sup>106</sup> Oh, le shebe ka moo mahlale le Lentsoe li sitiloeng ho bapa, joaloka ha li etsa kajeno. Li ne li ka sitoa pele. Ke hona joale moo li ka khonang.

<sup>107</sup> Lemohang, O itse, "lipontšo tsa leholimō, lipontšo tsa leholimō." Mahlale, le lipontšo tsa sechaba; joale kajeno ba behile lipontšo tse khōlō sepakapakeng, ba behile diastronoto le

ntho e 'ngoe le 'ngoe. Empa diastronoto tsena li etsang ho lefatše, pontšo? E a ba tšosa. Ha ba tsebe mohla ba ka romelang ntho e kang eo 'me ba lihela libomo tsena, 'me ha re sa tla ba teng. Ua bona? Joale tseo ke lipontšo tseo ba li behileng, liponahatso tse tšosang leholimōng. Ua bona? Ba li behile, dimisale tsa athomo le ntho e 'ngoe le e 'ngoe, lipontšo tsa mefuta eohle.

<sup>108</sup> Le bona moo ba saenileng ntho ena—ena tumellano, tsatsi le leng, ho thoe ha ba sa tla qhomisa libomo kantle, empa joale ba kena tlasa metsi le tlase mobung, ho li hlahloba ka ho tšoana. Ua bona? Ba saena tumellano, "Ha re ka ke ra etsa sena, haeba u re ha u sa tla e etsa (empa re khutlila lapeng re e etsa ka tsela ena; athe le uena re u tseba u etsa joalo koana)." Ua bona? Ha ho ntho le e 'ngoe feela, feela ke . . . ha ba tšepane, ha ho—ha ho letho. U ka . . . Ua bona? 'Me e mong le e mong o tšohile e mong. Eo ke pontšo e tšosang.

<sup>109</sup> Mahlale le motho le lichaba ba hlahisitse pontšo e tšosang lipakapakeng. Ke hantle haholo. Joale, ho tšabana. 'Me pontšo ea leholimō e teng e filoeng e . . . Ua bona joale, le bona ba fuoe pontšo leholimōng, pontšo e tšosang, monna oa moastronoto; a ka tšoha a tšoere misaele oa atomo, 'me a ka o rothisa oa timetsa sechaba sohle. Ho nyoloha ka astronoto, a ka ema kantle mane. Ha ho letho ho ba thibela ho etsa hoo. Ehlide ba ka e etsa, bao . . . nako efe ha ba batla. Ba ka se fetola lerole holane ba batlile, empa . . . metsotsong e leshome le metso e mehlano ho tloha joale. 'Me seo e mong a ka se etsang, le e mong a ka etsa joalo, hape. Ka hona, lea bona ba fumane pontšo, empa pontšo ea mofuta oo e a ba tšosa.

<sup>110</sup> Ba kōpana 'moho, ba lohanya matla a bona. Lefatše le lokolohileng, ba lohanya matla a bona. Bokomonisi bo lohanya matla a bona le Rashia. E mong le e mong; empa e mong o tšohile e mong. Ua bona, ke pontšo ea matsoalo. Ke hantle. Tseo lipontšo tsa lichaba, le lintho.

<sup>111</sup> Empa Kereke e fuoe Pontšo ea Lehelimō: Moastronoto! Amen! Jesu Kreste, ka sebopoho sa Tšiea ea Mollo; seo A kileng a ba sona ka ho Testamente ea Khale, eo A na le ho eona ha A kōpana le Saule tseleng e theohelang mono Damaseka, eèna Jesu eo o teng mona kajeno! 'Me ena E etsa'ng? Na E lihela matsoalo? E lihela lerato, ho kōpanya e mong le e mong. Amen! Ho utloelana. E lihela Lerato la Molimo, oh, ho re kōpanya le ho re tlisa, 'Mele oa Kreste, bonngoeng joalo ka Monyaluo. E etsa hoo hona joale, kōpano e khōlō ena eo Molimo . . .

<sup>112</sup> Ba ntse ba ikōpanya, sehlopha se seng *mona* se loantša se seng, sehlopha se seng ka *mona* ho loantša se seng. Athe mona kereke e eme lipakeng tsa bona; le shebe se etsahalang, e tla ikōpanya le bona. Ke hantle haholo. Empa, joale, re fihlela hoo ho lihela tšabo le litsieleho.

<sup>113</sup> Empa Kereke, Monyaluo, e kōpantsoe ke Molimo o le mong, tlas'a Moea o le mong, Moea oa Molimo, Kōpanong ea Molimo e le 'ngoe e halalelang, ho behoa Monyaluo a le mong ea halalelang ho Molimo. Ke hantle, 'moho; kōpano ea 'Mele. 'Mele o emeng joalo ka Monyaluo; joalo ka ha—joalo ka ha E le Monyaluo, ka ha re ipitsa Monyaluo. Bakeng sa nako ea kōpano ea Monyaluo, Kereke e a teana hakana. E loketse ho bōpa lerato feela har'a rōna, re batla re sa khone ho arohana. Ke hantle. Uena feela, ha u a tlameha ho qeka batho ho rapela, ha u a tlameha ho ba qeka ho rapela Molimo, ha u a tlameha ho ba qeka ho etsa ho lokileng. Ba Mo rata hakaale, ho fihlala ho se letho lesele.

<sup>114</sup> U re'ng ka ngoanana, mosetsana e motle haholo, ea tlil'o nyaloa ke tjaka ea mohlankana a mo rata sehlanya, ho eēna e bohloko, ho feta bophelo ba hae, 'me a tseba hantle ba tlil'o chata hang? Letsatsi la lechato ha le atamela, mothoana eo, kea u bolella, o tlala hohle "o a likoloha." Ua bona? O lokisa sohle; o inehela ho eēna ka botlalo. Ke hantle. Sohle se mo khahlang, ke sona seo a se batlang. Be, mokhoa oa Kereke o tlamehile joalo kajeno, maphelo a rōna a lokela ho patoa hakaale ka ho Molimo ka Kreste, ho tiisetsoa ka mono ke Moea o Halalelang.

<sup>115</sup> Seo e sa le ke le ruta sona mona, ke ho le bolella ka lipontšo tsena le ka lintho tse fapaneng tse etsahalang, ha ke na nako ea ho etsa joalo hona joale; e tla etsoa molaeatseng o mong, ha Morena a ratile. Empa ho sa na le nthoana e le 'ngoe e haellang ho Kereke. 'Me re batla seo, ho e finyella, 'me hona joale ke lintsing tsa eona. Ua bona? Re batla ho fihla ho eona, haeba... le tlameha ho e etsa. Haeba u sa etse, ke phetho feela, u tšoanelia ho e etsa. Hoba shebang, nakō ea kōpano e haufi, hoba Molimo o teanya Kereke 'moho ho ba e—e Hloibilo e isang lechatong la Kōpano e Khōlō: mohla Molimo le motho ba tlang ho kōpana ka Bosafeleng, mohla lihloliloeng tsa nako li hōlehanang le Bosafeleng.

<sup>116</sup> E ne e etsoe hang ka sebopoho sa Mora motho holima lefatše. 'Me A tlameha ho nehela Bophelo ba Hae ho hlahisa matla, ho kōpanya batho ba bang le Matla ona ana, bakeng sa Monyaluo oa Jesu Kreste. 'Me joale Kereke e Ikōpanya 'Meleng oa Kreste. E Itokolotse, e khaotse tlamonyana efe le efe, e ntse e Itokisa; ho teana 'moho, kōpano har'a bona; oh, lerato le thabo, le Moea o Halalelang o tsamaeang har'a bona. Oh, banna, ke nako e kakang!

<sup>117</sup> Joaloka ha re bona matata a itokisa, re bona makau a itokisa, re bona sebata... linotši li a itokisa, re bona maru a itokisetsa pula, re bona ntho ka 'ngoe; ka moo e ikōpanyang kateng, bakeng sa sekhhahla sa eona se seholo. Re bona Liki ea Lichaba, ea lichaba 'moho, li ikōpanya bokomonising. Re ba bona ba ikōpanya mona Lefatšeng la Bophirimela. Re bona kereke e ikōpanya 'moho, tse ling tsena tsohle. Ka baka leo ruri ha se ntho e ka etsoang, ha ho mohla litaba li neng li ka ema tjena; e ne e ke

ke ea etsoa lilemong tse mashome a mabeli tse fetileng, ho ne ho ke ke ha ba tjena. Ho ne ho ke ke ha ba tjena lilemong tse leshome tse fetileng, e tlameha ho ba joalo hona joale. Ua bona, hobane mekha ena le lintho li ne li eso finyelle malulo ana.

<sup>118</sup> Joale le phaphame! Le itsukutle, ka potlako ruri, 'me le shebe kantle mona moo re leng teng! Re ho kae? Joaloka banna bao ba bohlale, re lebahane le Lentsoe la Hae hantle, 'me Leseli la Morena le chabile tselaneng ea rōna. Khanya ho Molimo Holimōlimō. Le Khanya ho Molimo O re neang Jesu Kreste, Eo re mo ratang, 'me a re tlisitse tulong ena. 'Me e re re sa... Re batho ba Hae, ba rekiloeng ka moputso oa Mali a Hae.

<sup>119</sup> Oh, banna! Nako ea ho kōpana ha e fihla, re shebeletse, ha re ntse re kōpana e mong nq'a e mong ka littlamo tsa Moea oa Hae, re... Na e ka be le Moea oa Hae? Ehlide, Ke Moea oa Hae. Hobaneng e le Oona? Ke Lentsoe la Hae, 'me O a... oo ke Moea oa Lentsoe. 'Me ha Moea oo oa Pallo o lula holim'a hao 'me o nètèfatsa 'me o Iponahatsa hantle mona, ana e sa le Oona Moea oo? Ke Oona o nong o e na le Moshe feelleng! Ke Oona o nong o le holim'a Jesu Kreste! Ke eëna Ea kōpaneng le Saule tseleng ea hae ea Damaseka! E sa le Eëna maobane, kajeno, le ka mehla! 'Me O etsa ntho e tšoanang!

<sup>120</sup> 'Me re bona lichaba li le 'moho, re bona lihlooho tsa kereke li le 'moho, re bona bokomonisi 'moho, re bona mekha e kōpana, re bona lintho tsena tsohle; 'me joale re bona Monyaluo a kōpana le Lentsoe. Oh, banna! Ke nako eo bahalaleli ba tlang ho tsoha ho kōpana le ba phelang, ho tloha ho ea kōpana le Jesu Kreste ka Bosafeleng.

<sup>121</sup> Molimo re thuse, e mong le e mong, ho kōpana le Kreste bosiu bona, re tla inehela sohle seo re leng sona, sohle seo re se ruileng, moea oa rōna 'ohle, 'mele, le mohopolo, ho Jesu Kreste, le ho shebella nako eo ea kōpano.

Mohla terompeta ea Morena e llang, 'me nako  
e fela,

Hoseng ho hlakileng ho hotle, mohla ho  
thunyang mafube a Bohloleho;

Mohla bafu ba shoetseng ho Kreste ba tsohang  
ba kōpana mose oane ba se hbole ba eshoa  
('moho le Monyaluo ea phelang), ho nkua.

<sup>122</sup> Sheba kōpano! Molimo o kōpanya Kereke le Lentsoe la Hae, Lentsoe le Kereke, bobeli ba fetoha ntho e le 'ngoe, "Ho bua sena, 'me se tla etsahala. Etsa sena, 'me se tla etsahala. Ke eona; enoa ke 'Na ka pel'a lōna, enoa ke 'Na ea e kholisang; ke 'Na ea nang le lōna." Ho lokile.

<sup>123</sup> Joale re fumana ho fihla mohla Terompeta e llang, 'me bahalaleli bao ba robetseng morao mane, ba ke ke ba phetheha rōna re le sieo; ba itšetlehile ka rōna (Baheberu 11); 'me e tla re ha ba phutheha, ba kōpana le ba phelang. Kereke e kōpana le

Lentsoe, e be moo Kereke e kōpanang le Lentsoe, ba eba bang. Bahalaleli ba shoeleng bao le bahalaleli ba phelang bao ba teana 'moho ho ba bang; 'me bohle ba tloha 'moho ho kōpana le Kreste mose oane, bakeng sa Selallo sa Lenyalo la Konyana.

<sup>124</sup> Ke nako ea kōpano, 'me lipontšo li fefoha hohle. Lipontšo li lichabeng, lipontšo bokomonising, lipontšo Lefatšeng la Bophirima, lipontšo K'hanseleng ea Likereke. 'Me Pontšo e teng mona bosiung bona tlas'a temoso ea Moea o Halalelang, 'me Lentsoe la Molimo le a e thasisetsa le e fetola 'Nete. Amen! Nako ea kōpano! Pontšo ea Nako ea Kōpano!

Ha re inamiseng lihlooho tsa rōna.

<sup>125</sup> Morena Jesu, pelōana ea ka e kaba-kabisoa ke thabo, ha ke bona menyatla ea ka, monna oa lilemo tse bohareng, empa koana, menyetla ea ka ho U bona u fihla molokong ona; ho phela le ho ema mona, le ho bona mohla Terompeta eo e llang, "Ea silafetseng, o silafetse. Ea lokileng, o lokile. Ea halalelang, o a halalela." Oho Morena Molimo!

<sup>126</sup> Le inahana re eme, ka motsotso, ka ho panya ha leihlo, mohla lefatše lohle le sa tlo tseba se etsahalang, empa hang feela, u tla bona ka pel'a hao ho hlaha, baratuoa ba hao ba iketseng, ba tlie ho kōpana le uena hape. 'Me re tla fetoloa ka nako le motsotso, ka ho panya ha leihlo; le ho nkuoa, hammoho, ho kōpana le Morena oa rōna sebakeng. Le ho kōpana le Eèna, ho lula mono ka mehla, ho se hhole re tsoa ka pel'a Sefahleho sa Hae hape.

<sup>127</sup> Ke ntho e khōlō hakakang kajeno, Morena, ho tseba joale hobane re kōpantsoe ke Moea o le mong. Moea o le mong, Moea o Halalelang, o tśoere Lentsoe phuparong ea Oona, o kena ka ho rōna. 'Me ke ntho e khōlō hakakang, ke monyetla o mokakang ho lokoloha linthong tsohle tsa lefatše, ho itlamella ho Jesu Kreste. Le ho nahana hore tsatsi le leng, ka sebopeho sa 'mele, ka 'mele o tśoanang le 'mele oa Hae ka Sebele o tlotsitsoeng, re tla lula fatše tafoleng ea Selallo sa Lenyalo 'me teng ho kōpanngoa le ho nyaloa lenyalong ho Eèna; ho phela joaloka Monyalua le Monyali mehleng eohle e tlang ho tla, Bosafeleng bo sa khaotseng.

<sup>128</sup> Morena Molimo, ona e se be mohopolo oa khopolo-taba bathong, e mpe e be bonnête bo tiileng hakana ho fihlela tlala e kana le lenyora le tśoara batho hoo ba tlang ho...ba bala lipampiri tsa bona, ba shebile...ba mametse radio le litaba, le ho bona hobane ke nako ea kōpano. Lipontšo lia tśoelima.

<sup>129</sup> Morena Molimo, ho joaloka ha re buile ka basali, seo ba tla se etsa matsatsing a qetelo; seo kereke e tla se etsa matsatsing a qetelo; le seo Mengoaha ea Kereke e tlang ho ba sona, le seo Litiiso li tla ba sona, lintho tse ling tsena tsohle. 'Me rea bona joaloka mohlang oo, matsatsing a Nohe. Rea bona joaloka ha ho etsahetse, matsatsing a Sodoma le Lota, mohla Lengeloi la Molimo le neng le Itsebisa ka nama ea motho, ea jang nama ea

khomo a noa lebese la khomo, a ja bohobe; ho ema mono a khona bolela se etsahalang ka mora Hae. 'Me Jesu o boletse hoo ho tla etsahala ho tleng ha mora Motho.

<sup>130</sup> Morena Molimo, re bone piramide, ka moo re e hahileng holimō mane, le ho bona ka moo re ekelitseng lintho tsena ho eona; le ho iphumana re le nakong ea qetelo, ho emela Lejoesehlooho la Sekhutlo. Khanya ho Molimo! Rea rapela, Ntate, ho re U tla phaphamisa batho, ka potlako joale, le ho re kōpanya 'moho, ka lerato la borapeli le hlompho ho Jesu Kreste le e mong nq'a e mong.

<sup>131</sup> Ha ba le teng mona bosiung bona bao tšepo eo e sa ahang ka ho lōna, na u ka phahamisetsa Molimo letsoho la hao ka ho re, "Morena Molimo, ntlamelle le Uena, ntlamelle le Uena"? Molimo a u hlohonolofatse, moena. Molimo a u hlohonolofatse, le uena, uena; e. "Ntlamelle le Uena, Morena." E! Oh, banna!

Lichaba lia pshatleha, Israele e a phaphama,

<sup>132</sup> Shebang Israele koana, e kōpane 'moho. Israele, ho tsoa ka makhalo 'ohle a lefatše, e tlide ho ikōpana; ho ikōpana 'me joale ke sechaba. Ke sechaba se kōpaneng: se nang le folaga ea sona, chelete ea bona, sesole sa eona, ntho e 'ngoe le e 'ngoe; haeba ba kile ba e ba joalo, ba joalo hona joale. Israele e kōpane, Roma e kōpane, kereke e kōpane. 'Me Monyaluo o ntse a kōpana, amen; le ho khutla ha Kōpano e Khōlō eo. Ke eng? Ntho eohle e nyolohela Pontšong eo, Pontšo eo ea sehlooho e khōlō, Jesu le Monyaluo oa Hae ba kōpana nthong e le 'ngoe.

<sup>133</sup> Ntate, Molimo, aba mahlohonolo ana ao ke a kōpelang batho bana, 'me re tlameloe ho Uena pelōng le moeeng, ba sa phahamisa matsoho a bona, ba lakatsang hoo. Morena Molimo, re hloekise ho re etsa ba Hao; aba sena, Morena. Ke phetho seo re se tsebang 'me re ka se etsa, ke ho kōpa. 'Me hape U itse ha re kōpa taba 'me re e lumela, re tla e fuoa; ke e shebeletse, Morena. Ke U leboha ka Lebitso la Jesu Kreste. Amen.

Kea Mo rata, kea Mo rata,  
Hoba A nthatile pele,  
Le ho lefella poloko ea ka  
'Fateng sa Kalvari. (Amen. Oh, banna!)  
  
Bonang, Monyali o a tla!  
Ke utloa mohoo oa khitla!  
Re tla nyoloha ka lerata, ha re ka tiisetsa,  
Ho kōpana le Eèna sebakeng.  
  
Lebelu u rapele, moena oa ka,  
E mong a se hape moqhaka oa hao,  
Hoba ea fofo le mongala  
Ha ba apare mose oa lenyalo.

<sup>134</sup> Ke hantle. Ha re itokisetseng mohoo ona oa khitla. O fihla ka hora u sa e hopolang. Mohoo o tla fihla, ha u har'a lefatše le

sa lumeleng; e tla ba lekunutu. Empa balumeli, ba shebeletseng sena: Na le bona linaleli ha li kolohana mocheng? Ua bona? Taba eo e hlahisitse eng? Hantle feela joaloka ha e entse khetlo la pele. Ua bona, ke rōna bana, lipontšo lia fihla.

Re bona lipontšo tsa ho Tla ha Hae ho bokoang,  
Bonang, mahlaku a feiga a talafala joale;  
Taba tsa 'Muso li isitsoe 'chabaneng ka seng;  
Le joale re haufi, qetello e ka bonoa.

Ka thabo, hole koana, re tla tumisa Molaetsa  
oa ho hlaha ha Hae ho bokoang,

<sup>135</sup> Na ho joalo? Oh, tumisang Molaetsa oa ho hlaha ha Hae ho bokoang! Ke seo re tlamehang ho se etsa. Ho bolella mang le mang, "Itokise, hlophisetsa ho kōpana le Molimo." Amen! Kea Mo rata. Oh, ke Mo rata joang. Joale, ha re emeng ka maoto a rōna joale. Re sa memana, ho ntšetsana matsoho le ho tsukutlana le motho e mong, le ho re:

Ho fihlela re kōpana! (Tsukutla matsoho,  
joale.) . . . re kōpana!  
Maotong a Jesu re kōpana;  
Ho fihlela re . . .

Hopolang, u ka hlabeloa mokhosi. Kōpano ea rōna e hlahlamang e ka ba maotong a Hae.

Oh, Molimo a le sitse re be re kōpane!

<sup>136</sup> Joale, nahana feela, pele re kōpana hape; pele re kōpana Sontaha hoseng, kapa Laborarō bosiu, e ka ba . . . ntho ea pele ua tseba, motho e mong o nyametse. E mong enoa o nyametse, 'me ba tsamaile. Oh, ho nahana ka monna oa hao ea nyametseng, kapa mosali oa hao ea nyametseng, 'me—'me mosali oa John o nyametse, 'me—'me—'me ka mona bana ba nyametse. Ntho eohle e etsahetse (ho hlahile eng?), u tla be u setse!

Oh, lillo le melumaelo ha ba timetseng ba  
boleolloa qetello,  
Ba bitsa mafika le lithaba, (Joalo ka Israele, e  
khutlelang motseng, tempeleng.)  
Ba rapetse feela thapelo tsa bona li morao. (Ba  
hanetse Molaetsa.)

<sup>137</sup> Oh, moena, se etse joalo le ka mohla. Leha u ka etsang, emela morero oo ka sebete! E, monghali!

<sup>138</sup> Joale, ho fihlela re kōpana, re tla etsa sena:

Inkele 'Bitso la Jesu,  
Ke tsebe sefing ka seng;  
Meleko ha e u lika, (U etsa'ng?)  
Bitsa Lebitso le khethoang leo ka thapelo.

'Bitso le ratoang, oho le monate!  
 Tšepo ea lefatše le thabo ea Leholidō;  
 'Bitso le ratoang, oho le monate!  
 Tšepo ea lefatše le thabo ea Leholidō.

<sup>139</sup> Ha re inamiseng lihlooho tsa rōna joale, re sa e binela ka marameng:

'Bitsong la Jesu ba inama,  
 Maotong a Hae ba namalla,  
 Khosi ea likhosi Leholidōng . . . O tla tlotloa,  
 Ha 'eto la rōna le felile. (E tla etsoa, tsatsi le leng.)  
 Oho 'Bitso le ratoang, 'Bitso le ratoang, oho le monate!

Ho fihlela re kōpana, Molimo a le sitse.

Tšepo ea lefatše le thabo ea Leholidō;  
 'Bitso le ratoang, oho le monate! Le monate!  
 Tšepo ea lefatše le thabo ea Leholidō.



*NAKO EA KÖPANO LE PONTŠO* SST63-0818  
(The Uniting Time And Sign)

Molaetsa wona, ka Moena William Marrion Branham, o rerilwe sethatong ka Senyesemane Sontaha mantsiboya, Phato 18, 1963, Branham Tabernakel, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)